

# Anna Laura Klucker fa anzatge nov da tradiziùns viglias

CUN ANNA LAURA KLUCKER  
À DASCURIEU BARTOLOME TSCHARNER

■ Savens vean ozigligi stivgieu tradiziùns dad otras culturas, dafartànt ca las indigenas vignan negligidas a van a pearder. La giuvna Anna Laura Klucker da Tamegn à fatg la veia cuntrari: Cun stivgear igl easter à la prieu d'ancanuscher egna tradiziùn indigena c'è tant sco svanida – igl petg an crusch ca vagneva duvro par ornar da tutas sorts telas. Mo ella à betga me stivgieu tecnica a musters vigls, ella dovra quels par stgafir anzatge nov ordlander. Me aschi àn tradiziùns egna schànza da survivor a lùnga vesta. An egn text, ca vean publitgieu an LQ an suczessiùns, safatschenda ella cun que petg tipic grischùn. Dantànt vaina lieu saver dad ella igls motivs par la sia lavur ad igls resultats da quella.

*Partge safatschenda egna mata moderna gest cuagl petg an crusch, egn petg tradiziunal?*

**Anna Laura Klucker:** Jou sund vagnida confruntada cuagl petg an crusch, parquegl ca nus vagn gieu la lezta da la scola d'art anor d'amprender d'ancanuscher otras culturas. An que conex lev'jou dantànt saver tge spezialitads ca la nosssa cultura vegi, ad jou ve lieu amprender d'ancanuscher meglier quellas. Alura ve jou scurviert que petg. Senaquegl ve jou cato cudeschs da musters vigls tier nus a tgea. Jou eara incantada da lur expressiùn. Ascheia ca resanteva ca quels musters segian betga vigls, mobagn els mi parevan schizund moderns. Els mi àn anschiet a faszinar. Jou sund egn carstgàn ca safatschenda bugent cun las nosssas tradiziùns. Jou igls admir a lavur bugent cun elemaints tradiziunals par crear anzatge nov cun quels.

*Tei às manzuno la scola da Turitg. Tge scola e quegl?*

Jou studeg a la Scola òlta d'art a Turitg (ZHdK). Là fetsch jou igl studi par intermediar art a design. Quegl e igl studi par introdutgear la gliued agl art.

*Tge fagez practicameing an que studi?*

An que gro eassan fetg libers. Pigl mu maint dastgainsa realisar agens projects. Agl noss studi dat igl tres diferaintas spartas. Jou fetsch part da la sparta design. Nus luvragn fetg savens da maniera product-orientada, quegl munta ca nus vagn d'obtaner egn product duvrabel a la fegn. Nus vagn peia da studagear egn product davent da l'antscheata antoca la fegn. Quegl cumpeggia par fegn da plansiar co ign setgi vender el. Ussa gest sund jou fatschandada cun la mia lavur da bachelor. Agl rom da quella ve jou peia sadeditgieu digl petg an crusch.

*An tge gro sadisfranztescha igl petg an crusch dad oters petgs?*

El sadisfranztescha d'oters petgs parquegl c'el e atgnameing sempel da far. Parquegl eara l'ear aschi popular tier nus, a blearas dunas c'aplitgeavan el. Agl curs digl 19avel tschantaner dev'igl parfegn carnets cun musters c'earan fetg populars. Graztga a quels ancunaschaisa ànc ozigligi quels. Propi igl spezial digl petg an crusch grischùn e c'ear la vart davos vean elavurada. Tanor igl cudesch dastga quella me aver fils horizontal, els dastgan betga sacruschar davosvart. Quegl nava alura aschi anavànt ca dunas cusevan igl fil an la surcusida davanttier, me par coresponder a quella pretensiùn.

*Partge vagneva l'alura duvro igl petg an crusch?*

El eara igl petg ple tipic par ambalir da tutas sorts telas agl tanertgea, par



Elly e egn ragl da quater parts, dessignieu a realiso dad Anna Laura Klucker. Ella fa part da la sia colecziùn da la marca «July».

FOTOS MAD

exaimpel par ambalir zuelas, curveias par meter segls letgs near tuaglias. Sen la vastgadira tgeat'ign atgnameing pocas surcusidas fatgas cuagl petg an crusch. Ansasez e'l me da catar segls costumes, tant segl costum da dumeingias sco ear quel da luvergis. Mo savens vagneva l' duvro là me par far las inizialas. Cuagl petg an crusch levàn las dunas ear musar lur anschegn, mussar c'ellas setgan far anzatge spezial par ornar lur telas. Igl ornar eara ear egn tgossa da prestige da mintga tgasaregna.

*Alura e que petg peia vagnieu invento agl Grischùn?*

Na, gliez betg. El e vagnieu impurto agl Grischùn ànc durànt igl tains miez. El e oriund digl Oriaint a cuagl comerzi à l'cato la veia tier nus. Agl 16avel tschantaner e'l vagnieu popular agl Grischùn. Igl spezial e ca que petg à alura samantanieu surtut agl Grischùn. La raschùn quatier e la situaziùn isolada da las valadas grischùnas. Quella situaziùn à favuriso ca quella furma da petg e saconservada surtut agl Grischùn, dafartànt c'utro vagnevan an moda oters petgs. Quels en betga rivos aschi dabot tier nus ascheia c'igl petg an crusch à pudieu sataner. Egn oter punct, c'è promovieu igl petg an crusch, e l'introducziùn da la lavur a màn an scola.

*Mo igl deva ear cusùnzas grischùnas ca promovevan igl petg an crusch.*

Ea, quegl e surtut sto l'Elly Koch da Cuira. Ella eara ida an tut las valadas grischùnas par studagear igls musters c'ella rimnava a publitgeava. Graztga ad ella ancunaschaisa ànc ozigligi blears musters. Ella à coptgieu quels: Ella saseva en stiva da las dunas, par part durànt antieras notgs, par studagear a coptgear igls musters. Ella e stada la pioniera digl petg an crusch.

*Tge fegnamiras às tei cun quella lavur? Vul reactivar igl diever digl petg an crusch?*

Par me persunalmeing e quegl sto egn scuvierca c'è inspirò me fetg. Sco getg, jou sund anzatgi c'è bugent tradiziùns per saver far anzatge nov landeror. Natralmeing e'gl egn fegnamira d'infurmar sur digl petg an crusch, sperànd c'el vigni forsà puspe ple popular. Partge ànc avànt dus on ancunaschev'jou meza betg igl petg an crusch. Nus vevan betga tracto quel an scola. Cun la mia lavur da bachelor less jou cuntanscher ca ple bleara gliued vigni a saver c'igl detti igl petg an crusch grischùn. Jou vi surtut mussar ca nus vegian aschi bealas a custeplas tradiziùns c'ign po far anzatge nov ordlander. Mo igl petg an crusch sco tal drov jou atgnameing betga par surcurser.

*Tei dovrà peia me igls musters digl petg an crusch?*

Ea, gest an conex cun la mia lavur da bachelor ve jou duvro quels sco inspiraзиùn, quegl vut gir, jou ve duvro igls elemaints da quels musters a cumbino els danov a stagafieu novs designs cun els par decorar raglia. Par las mia creaziùns sund jou vagnida influenzada digl petg an crusch a digl costum grischùn. Sen fundamaint da quel ve jou alura creo la rassa «Elly» ca sacumpona da quater parts. Tutas parts pon ign trer aint singular, mo ign po ear purtar tutas parts ansemel. Quegl coresponda agl costum. Lez à ear diferaintas parts singulars c'ign sto dantànt trer aint tutas ansemel. Mo alura vez'ign adigna or tutegna. Jou leva far egn rassa c'ign vezi adigna puspe or otrameing. La basa par quella lavur e verameing stada igl petg an crusch ca mi à inspirò da far que ragl da feasta.

Par prender anvesta a las creaziùns novas dad Anna Laura Klucker pon ign ear visitar la pagina [www.yuli-fashion.ch](http://www.yuli-fashion.ch)



Elly cunsista da top, blusa, d'egna rassa cun fòldas a d'egna rassa da tul. «Elly» de far anur ad Elly Koch, la pioniera digl petg an crusch.

## Tgi e Anna Laura Klucker?

■ Anna Laura Klucker e carschida sei a Tamegn sco feglia ple viglia d'Erica a Christian Klucker, peia an egn famiglia incantada d'art a cultura. Da sieus bab dariva la sia carezta pigl tgànt a da la vart da sia mama quella pigl art figurativ.

Ella seza à egn passiùn par vastgadira extraordinaria, fatga cun bleara fantasia.

La natira a las muntognas grischùnas resainta Anna Laura betga sco cuncontrast, mobagn sco elemaint, ca culleii igl noss cantùn, a ca segi la funtana par egn tut atgna tadiziùn, cun la quala ella safatschenda da maniera

creativa. «Cun 12 ons ve jou ampriu da cuser da mia mama», gi Anna Laura, «alura ve jou cusieu igl mieus ampremp ragl.

Ampo ple tard ve jou fatg igl mieus ampremp vastgieu festiv par la cunfirmaziùn.»

Par la lavur da matura veva ella cusieu egn vastgieu da material reziclo, numnànd quella cusitura «Recycle Couture». Quella raglia fageva part da la sia amprema mustra da moda da vastgadira digl 2013.

Davent digl 2015 studegia ella a la Scola òlta d'art a Turitg.



Anna Laura Klucker e faszinada da bealas telas particularas.

MAD